

Nenad Nikolić, inženjer geodezije



Početak 2020. godine, porodicu, kolege i prijatelje je iznenadila i ražalostila tužna vijest da je prestalo da kuca srce velikog čovjeka Nikolić Nenada, geodetskog inženjera. Krasile su ga najljepše ljudske vrline. Bio je veliki stručnjak sa ogromnim iskustvom u oblasti katastra i inženjerske geodezije. Dugo vremena je svoje bogato geodetsko iskustvo prenosio na mlade geodetske naraštaje Prohladnog 30. januarskog dana 2020. godine na gradskom groblju Crkvice u Zenici okupili su se članovi porodice, kolege, komšije i prijatelji kako bi na vječni počinak ispratili Nenada Nikolića.

Nenad Nikolić je rođen 1940. godine u Slavonskom Brodu. Sretno djetinjstvo je proveo sa roditeljima u Doboju gdje je završio nižu gimnaziju. Tokom školovanja u gimnaziji isticao se

kao vrijedan i marljiv đak sa zapaženim uspjehom. Nakon završetka gimnazije upisao se u Geodetsku tehničku školu u Sarajevu koju je uspješno završio 1960. godine.

Nakon završetka srednje škole upisuje se na Višu geodetsku školu u Sarajevu koju je završio 1962. godine i stekao zvanje inženjera geodezije.

Po završetku Više geodetske škole u Sarajevu zapošljava se u Općini Doboj gdje dvije godine radi u katastru. Tokom rada u općini Doboj stupa u brak sa Evom koja je takođe završila Geodetsku tehničku školu u Sarajevu. U Željezari Zenica se zapošljava 1964. godine. Tokom najveće ekspanzije i izgradnje željezare u Zenici, radio je na poslovima inženjerske geodezije i deformacione analize. U Željezari ostaje do 1995. godine kada prelazi u firmu Geoservis d.o.o. u Puli u Republici Hrvatskoj. U ovoj firmi radi na poslovima premjera i inženjerske geodezije i u njoj ostaje do 1998. godine kada prelazi u Općinu Novi Travnik. Prelaskom u općinu Novi Travnik, radi na poslovima Stručnog saradnika za geodetske poslove pri Službi za imovinsko-pravne poslove, katastar i urbanizam.

Kao zaposlenik općine Novi Travnik, svakodnevno je vršio vještačenja u upravnim postupcima pri Općini Novi Travnik. Vrlo često je vršio vještačenja u sudskim postupcima pri Općinskom sudu u Novom Travniku, Travniku, a nekad i Općinskom sudu u Bugojnu.

U zasluženu penziju je otišao 2005. godine.

Skladan i harmoničan život je proveo u sretnom braku sa suprugom Evom sa kojom je imao sinove Igora i Mladena.

Smrću kolege Nenada, geodetska struka je pretrpjela veliki i nenadoknadivi gubitak. Kolege su izgubile velikog prijatelja i velikog čovjeka koji se svakodnevno trudio mlađim naraštajima prenijeti svoje bogato iskustvo stečeno na poslovima inženjerske geodezije i katastra.